

www.BibleForChildren.org

Matius 1




Ontok diri koonom vulan di Lojibit do momontijan,
suuono dii kavagu di Kinoringan i moloikat Jibrail
do mongoi siri di iso raraa siri Bandar Nasarit siri
Vonuvo Golilia. Ngaran nopo di raraa diri nga i Moria,
i napagangan di Jusip, i koturunan di Raja Daud.



Om pitangarno kavagu i moloikat do,
"Moria, ada rumosi do opuavang i
Kinoringan mamarakat dika.
Oinomod bo do kopomontijanko
om osusu nopo tanak diri nga
kusai, om ponguranai mujuno
iri do i Yisus. Om Isidono
sumiliu do tulun tagajo om i
roitan do Tanak di Kinoringan,
i Agajo Marong Kuasa."



"Om Tuhanno, i Kinoringan, i posiliu
Disido do raja irad di takiJo, i
Raja Daud. Om Isidono
momorinta diri koturunan di
Yakub gosob do salaid-laid;
om auso koompusan di
kopomorintaanJo,"
kadiri moloikat do
minitangar di Moria.



Nga mokiilo dii i Moria di moloikat do,
"Potingkuro no ino do aupo nasavo
oku?" ka. Nga jawapno dii i moloikat
do, "Mindaau i Tatod Tolidang sino
dika, om sinundui Disido i Agajo
Marong Kuasa do
mongolopot dikau.
Iri no karait-rai do
olidang i tanak do
paganakannu, om
roitano do Tanak
do Kinoringan."



Om korongou nopo di Moria iri, om piogono isido momorompon om sokidno isido do mongoi siri iso bandar siri Vonuvo Yudia. Om korikot nopo dii isido siri bandar diri, om asuno isido siri valai di Jokoria om salamno dii di Lojibit. Nga korongou nopo i Lojibit di pananalam di Moria, nga turus do ginumuran iri tanak siri tijan disido, om I nosuanno dii i Lojibit



di kuasa do
Tatod Tolidang.




Om pitangarno i Lojibit do opuod marong do irad diti, "Agajono i nibarakat do Kinoringan dikau mantad di nibarakat di tongotongondu vokon, om ino paganakannu nogi nga kibarakat."



Om kinosusuvan nopo di Yisus Koristus nga irad diti. Diri mipogong nogi di Jusip om i Moria, iinojo di Yisus, do aupo nokopidudun iolo om noilaanno laid do nokopomontijanno i Moria. Om tijanjo nopo diri nga mantad di kuasa di Tatod Tolidang.



Om ii nopo pogong di Moria
om otulid ginavo, jadi au
moo isido mangawin. Kivaro
daa dii ginavo di Jusip
mosok-losok mongidu
di pipagangan, do au
moo isido paraat
do ngaran di
pogongjo siri
gotuvang do tulun toguu.



Nga di modop-odop i Jusip minsoromopo pasal diri nokoodop dii, om nokoipi dii isido do kivaro iso moloikat do Tuhan do minitangar do ka, "Jusip, koturunan di Daud, ada rumosi do manansavo dilo pogongnu, i Moria. Do tijan nopo dilo nga mantadi di Tatod Tolidang."



"Om osusu nopo i tanak diri nga kusai, om ponguranai mujuno iri do i Yisus, do Isidono momijau di tongotulunJo mantad siri duso diolo," kadi moloikat di Jusip.



Koposik nopo di i Jusip, suutono disido iri tinangar diri moloikat do Tuhan do mongoi manansavo di Moria. Nga di aupo nosusu i tanak kusai diri, aupo dinudunjo i Moria. Kosusu nopo di i tanak om ponguranai di di Jusip do i Yisus.



Ontok di kinosusuvan di Yaya om minonuu i Raja
Koisar Agustus do mongijap kasangkat do tulun
siri tongovonuvo iri
porintawonjo. Om
kasangkat di
tongotulun nga
sompori-ori



dii muli siri kampung doisido do mokidaptar.



Om i Jusip nga minuli nogi siri Bandar Boitlim siri
Vonuvo Yudia mantad silo Bandar Nasarit siri Vonuvo
Golilia. Do sirino Bandar
Boitlim i kinosusuvo di
Raja Daud om i
Jusip nopo nga
koturunan

di Daud.



Om ongoino dii i Jusip siri supaya kadaptar ngaran disido duvo di pogongjo, i Moria. Nga iri nopo pogongjo diri om momontijan.



Nga ontok di siri
Boitlim iolo om
norikotno dii i
kosusuvan di Moria.



Om kosusu nopo dii isido di tanakjo gulu nga kusai. Om
lopotono dii disido i tanakjo di tambam om poododopo
si ponumadan do sapi, sabap
noovian iolo do ijonon
siri valai
ririkoton.



Nga kivaro piipiro tulun do momimiara do kambing
biri-birijo siri pangkatapan do kambing si somok
Bandar Boitlim diri ontok di
totuvong.



Om tigogi dii do navaangan iolo di vinaang siri
misoliput diolo do minintalang iri iso moloikat do
Tuhan siri diolo, om nokorosi dii
marong iolo.



Nga kadi moloikat diolo, "Ada kou korosi! Do ioku
nopo diti nga porongou dikovu do abar do aandai.
Om abar nopo diti nga papasanang

do ginavo
do

kasaangkat
di
tongotulun."



"Do sodop maino nosusuno iri Momimijau dikovu siti
Boitlim i bandar di Raja Daud. Isidono
i Koristus om Tuhan."



"Om pongintutunan muju nopo nga osomungan muju iso tanak topoyok linopot do tambam poingodop siri ponumadan do sapi," kadi moloikat.



Om tigogi dii do oguu marong i moloikat mantad soi
suruga do kinumoruang diri moloikat do
mitangar di momimiara do kambing
biri-biri, ...



... om mangarajou di iolo di Kinoringan do ka,
"Pangarajou tokouno di Kinoringan i
poingijon soi savat suruga, ..."



"... om mokianu tokouno Disido supaya
osondodno i ginavo di tongotulun siti
vonuvo iri kaandaian Disido!"



kadi
tongomoloikat.



Om korijang nopo dii i tongomoloikat
mantad si di momimiara do kambing
biri-biri do minuli soi suruga, om
poiangat-angatno dii i momimiara do ka,
...



... "Kayo tokouno mongoi soi Boitlim,
mongontong tokou diri komoion di Tuhan,
i nipoilo diri moloikat daton," kadiolo.



Om piogono dii iolo mampanau, om
kaayangai dii diolo i Moria, om i Jusip
om i Tanak kosususu do poingodop
siri saralom ponumadan do sapi.



Nga kaantangai nopo dii diolo,
om poiloono dii diolo i tangar
di moloikat pasal di Tanak.



Kinosusuvon nopo di Yisus nga silo Bandar Boitlim si Vonuvo Yudia. Om ontok nopo diri nga kivaro iso raja siri Yudia, iIrudis ngaranjo.

Nga kivaro kama sontoun lobi mantad diri kinosusuvan di Yisus om rikotno dii iri piipiro tulun i moilo mongintutun di korombituon silo Bandar Yorusalim mantad silo kosilauon.



Om
songkoduat-duato
diolo di tongotulun
nong, "Inombo naku
i tanak do
nosusu i

sumiliu do Raja do
momorinta di tongotulun
Joudi do insan tadau?"



"Do soi ikoipo
kosilauon om
naantanganja iso
korombituon
minimvulai,

tanda do nosusu Isido, om
mongoi ikoi daa sumamba
Disido," kadiri tongotulun
mantad kosilauon.



Om mantad diri
mosok-losok dii i Raja
Irudis do mongoloou di
tulun i moilo mongintutun
di korombitun, do
mongoduat diolo nong
sombia nokovulai i
korombitun i komoion
diolo.



Om korongou nopo dii isido
diri tinangar diolo, om
suujo nogi dii iolo mongoi
silo Bandar Boitlim do,
"Ongoi kouno pogi om
iumon mujuno marong i
Tanak. Om osomungan muju
nopo, om gumuli kouno siti
do popoilo dogo, supaya
ioku nogi nga koongoi
sumamba
Disido," ka.



Korongou nopo dii iolo diri tinangar di raja om
pakaayaino dii diolo. Om kaantangai dii kavagu diolo i
korombituon di naantangan
laid diolo siri kosilauon.
Om andaian marong
dii iolo sombia do
naantangan diolo
di korombituon.



Om manau-panau iri korombitun siri gulu diolo gosobi
do nakapantok di nijonon di Tanak, om indada nogi dii
i korombitun.



Korikot nopo dii iolo siri valai, asuno dii iolo, om
naantangan dii iri Tanak duvo di Moria iinojo.

Om singkotudno dii iolo do
sumamba di Yisus. Om ukabaino
dii diolo i pinoijanan di arata
do pataakon toomod Disido,
irino amas,
komonian om
muur di taangod.



Om ontok nopo di sodop diri om pitangarno dii i
Kinoringan saralom do tinipi diolo do, "Ada kou
gumuli siri di Irudis," ka.

Om korongou nopo dii iolo di
tinangaran do Kinoringan om
vaja dii iolo di ralan sondiang
do muli siri
vonuvo diolo.



Kapanau nopo dii i
tongotulun di moilo
mongintutun di
korombitun, om
nokoipino i Jusip do
kivaro iso moloikat
do Tuhan do monuu
do ka, . . .



... "Tungagno, om ovitono
ilo Tanak om iinoJo tumuun
soi Vonuvo Masir, om
mindada koupo soi gosob do
poiloonKu ika kavagu do
obuliko muli, do mogium
iIrudis dilo Tanak
do patajon," ka.





Om tungagno dii i Jusip
om ovitono dii i Tanak duvo
diinoJo tumuun di otuvongpo
do mongoi soi Vonuvo Masir
irad di tinangar di moloikat.
Om indadano dii iolo
soi Vonuvo Masir
gosobi do napatai
i Raja Irudis.





Iri nopo kinaangaian diolo
soi Masir dii nga porikot
di tinangaran do Tuhan i
pinolombus di nabi pogulu
do irad diti, "LoovonKu
i TanakKu mantad soi
Vonuvo Masir,' kadi
Tuhan," kadi nabi.




Ontok di koilaa di Raja Irudis
do tinoro isido di tulun i moilo
mongintutun di korombitun,
araatan dii marong isido.



Om ponuu dii isido do
tulunjo mongoi mamatai di
tongotangaanak kusai noopo
i gosob di umur duvono toun
silo Bandar Boitlim om
tongokampung misoliputjo.



Minonuu isido mamatai do
tongotangaanak kusai gosob
umur duvono toun do minaja
isido di niabar di tulun i moilo
mongintutun di korombituon do,
"Kivaro duvono toun kama
mantad di kinosilaan diri



korombituon
pogulu," ka.



Nga kapatai nopo dii i Raja
Irudis om nokoipi i Jusip do
kivaro iso moloikat do Tuhan
ontok diolo soipo Vonuvo
Masir do monuu do ka,

“Tungagno pogi om
ovitono ilo Tanak om
iinoJo do muli kavagu
soi Vonuvo Israil do
napataino dii

iri raja i sipamatai
daa dino Tanak,”
kadi moloikat.




Nga karangaai nopo dii
disido do i Arkolius,
tanak di Raja Irudis,
nokosuvoli do raja
momorinta siri
Vonuvo



Yudia, om
rumosi dii iolo do rumikot
silo Yudia. Nga poipijono vagu isido
do au moo i Kinoringan do gumuli silo Yudia. Jadi
potilombusai dii diolo mongoi silo Vonuvo Golilia.



Korikot nopo dii iolo
silo om indadano dii
iolo siri bandar roitan
do Nasarit. Iri nopo
kinorikatan



diolo siri
Bandar Nasarit dii nga
porikot di tinangaran di kinomoi
di tongonabi pogulu do irad diti, "Tulun
Nasarit pongoroitan diolo di Yisus," ka.



Do au marong
kojuu i Kinoringan
di tongotulun siti vonuvo gosob do
pinataak Oku Disido do apatai, do
Iokuno i TanakJo tunggal, supaya
isai-isai nopo aparsaya Dogo om
kaanu do kovijaan diri auso
koovion om aui obinasa
i tatodjo.



Ruum 3:23

do kasaangkat nga nakapamaal do duso om nokoinsodu mantad di vinaang do kagajaan di Kinoringan.

Ruum 6:23

Do isuli nopo diri duso nga kapatajan, nga iri nopo itaak do Kinoringan toomod nga kovijaan di auso koovion, do nokopiisono di Koristus Yisus i Tuhan tokou.

Ibrani 9:27

Nga tinantu do Kinoringan do kasangkat do tulun nga insan noo kapatai, om mantad diri oukuman iolo Disido.

Ipisus 2:8,9

Do kinovijaan tokou nopo nga sabap opuavang i Kinoringan daton do aparsaya tokou di Koristus, om okoniko mantad do tumos tokou do kumaraja do pinataak nopo toomod do Kinoringan.



Jadi nong irad dino auso kinoontodo tokou do misinggagajo, do okoniko mantad di karaja tokou kondiri do kaanu tokou di kovijaan diri auso koovion.

Ruum 10:9,10

Do nong mangakun iti kabang tokou do i Yisus nopo nga i Tuhan tokou, om aparsaya iti ginavo tokou do vinijau di Kinoringan Isido mantad si pialatan di tongotulun di nongapatai nga kaanu tokovi do kovijaan do auso koovion. Do mantad di ginavo do aparsaya i tulun om pakabanaron nogi isido di Kinoringan, om mantadi di kabang di tulun mangakun om onuan isido do kovijaan.



Yaya 3:16,17 Do au marong kojuu i Kinoringan di tongotulun siti vonuvo gosob do pinataak Oku Disido do apatai, do Iokuno i TanakJo tunggal, supaya isai-isai nopo aparsaya Dogo om kaanu do kovijaan diri auso koovion om aui obinasa i tatodjo. Do kinoponuan nopo di Kinoringan Dogo i TanakJo siti vonuvo nga momijau di tongotulun, om okoniko do momutus.

1 Yaya 5:11-13 Om itino kosoksianJo do noonuan tokou di Kinoringan di kovijaan do auso koovion, om kovijaan nopo diri nga si di TanakJo. Isaai nopo i manansanganu di Tanak do Kinoringan nga irino kivaro kovijaan do auso koovion, nga isaai nopo i au manansanganu di Tanak do Kinoringan nga ausono kovijaanjo. Potulisonku kasangkat iti siti surat pokoyon si dikovu diri naparsaya di ngaran di Tanak do Kinoringan supaya koilo kou do nasanganu muju i kovijaan di auso koovion.



Matius 1-2; Lukas 1-2

Storyline by: Edward D. Hughes

Illustrated by: M. Maillot
and Alastair Paterson

Adapted by: E. Frischbutter; Sarah S.

Kadazan, Labuk-Kinabatangan Bible (dtb) © 1995,
Wycliffe Bible Translators, Inc. All rights reserved.

<https://live.bible.is/bible/DTBWBT/MAT/1>

©2024 Bible for Children, Inc.

www.M1914.org

www.bibleforchildren.org

